

DE  
CADAVERIS INSPECTIONE  
SIVE  
SECTIONE LEGALI

QVAM  
RECTORE MAGNIFICENTISSIMO  
SERENISSIMO PRINCIPE AC DOMINO  
DOMINO  
ERNESTO AVGVSTO

DVCE SAXONIAE IVLIACI CLIVIAE MONTIVM AN-  
GARIAE ET WESTPHALIAE RELIQUA  
SVMMO TOTIVS CAESAREI EQVITATVS PRAEFECTO AC LEGIO-  
NIS PEDESTRIS AEQVE AC EQVESTRIS TRIBVNO  
EODEMQVE CAESAREO

PRAESIDE  
HERMANNO FRID. TEICHMEYERO

HEREDITARIO IN CAMSDORF ET WENIGEN-IENA.  
PHIL. ET MED. DOCT. ANAT. CHIRVRG. ET BOTAN. P. P. ORD. SERENISS.  
SAXON. DVC. VINAR. ET ISENAC. CONSIL. AVL. ARCHIATRO ET PHYSICO  
ACADEM. IMPERIAL. LEOPOL. CAROL. ET SOC. SCIENT. REG.  
BORVSS. SODALI  
PRAECEPTORE PATRONO ATQVE PROMOTORE OMNI PIETATIS  
CVLTV PROSEQUENDO

PRO LICENTIA  
SVMMIS IN ARTE MEDICA HONORIBVS RITE OBTINENDIS  
PVBLICO EXAMINI SVBMITTIT


A V C T O R  
IOANNES ERNESTVS GREDING  
MED. PRACT. ZWICKAV.

AD D. NOV. ANNI MDCCXLII

IENAE LITTERIS SCHILLIANIS.



C



F. N. F.

## PRAEFAMEN.



nter præcipua arduaue negotia, quæ  
humeris medici promoti atque in offi-  
cio publico constituti imposita sunt,  
referuntur et sectiones legales atque  
depositiones forenses.

Errores, qui in eiusmodi actionibus maximi  
certè momenti a multis prohdolor! committi so-  
lent, iam omnes enumerare, ob multitudinem  
fieri sane non potest. Multi dantur, qui sectiones  
et depositiones forenses negligenti peragunt ani-  
mo; imo, quod dolendum, multi nesciunt, quid  
qualeque sit eiusmodi officium, et quæ ad hoc cau-  
te suscipiendum requirantur. Alii, leui brachio  
tales suscipientes actus, produnt leuiculam scien-  
tiam

A

tiam

tiam, in primis, cum visum et repertum, ut exacte principiis respondeat anatomicis, consignare minime valeant.

Errorum, in quos imperiti medici rapti fuerunt sectiones instituentes, iam iam cumulum celebratissimi duo medici Lipsienses, WELSCHIVS nempe atque AMMANNVS, hic in *medicina critica*, ille in *rationali vulnerum lethalium iudicio* in medium produxerunt; eoque ipso satis dilucide fuerunt testati, quam turpe sit artis doctori, ea nescire, quae omnino ex asse scire deberet.

Quid itaque ad hoc arduum negotium tam in materialibus, quam in formalibus requiratur, medicum forenssem exacte pernoscere oportet, ne errores committens conscientiam suam atque famam laedat, sed ut potius errores, ab aliis perpetratos, emendet atque rem, vario subiectam periculo, penitus introspiciat. Hac propter consilium nostrum eo tendit, ut ea, quae medico forensi ex hac parte incumbant, successive pertractemus.

Faxit summum Numen, ut omnia feliciter succedant.

## DE

CADAVERIS INSPECTIONE, SIVE  
SECTIONE IUDICIALI.

**C**adaveris inspectio est actus iudicialis, in quo iudice dirigente, actuario et scabinis praesentibus, cadaver occisi a medicis et chirurgis diligen-

ligenter secatur et inspicitur, ut postmodum de qualitate, quantitate et reliquis vulneris circumstantiis a medicis accuratum iudicium ferri et exinde poena delinquentis futura determinari possit.

## §. II.

Differt haec iudicialis sectio a sectionibus extraiudicialibus, quae a medicis suscipi solent vel publice vel priuatim.

## §. III.

Publicae sectiones suscipiuntur in theatro anatomico ab anatomiae professoribus: Hae sectiones omni commendatione dignae sunt. Docentur enim et demonstrantur in iisdem ea, quae in physiologia et pathologia medico perquam necessaria sunt, et huius scientiam praxinque futuram et genuinam tam clinicam, quam forensam exornare et perficere possunt ac debent. Hancce medicorum anatomam iure diuino et humano licitam esse confirmari debet. JCtus Lipsiensis GEORG. TOBIAS SCHVVENDDÖRFFER in speciali dissertatione, respondente *Joachimo Andr. Corvino*, et novissime Illustris CHRISTOPH IACOBVS TREVVE in *Vertheidigung der Anatomie*, daß selbe nicht nur, in allen göttlichen und menschlichen Gesetzen erlaubt, sondern auch an sich selbst nicht verächtlich sey. Norimb. 1722. qui insimul historiam anatomiae pulchre descripsit.

## §. IV.

Priuatæ sectiones saepissime instituuntur a medicis practicis, ut causae mortis in morbis appareant. Hae etiam admodum sunt necessariae, quemadmodum

dum patet inter alia ex THEOPHILI BONETI *seputchreto* siue anatomia practica, opere magno et elegant, imo omnibus practicis pernecessario. Eiusmodi anatomias susceperunt antiquissimis temporibus *Herophilus* et *Erasistratus*, teste CELSO *Lib. I. in praefat.* qui ita scribit: *Necessarium esse incidere corpora mortuorum, eorumque viscera atque intestina scrutari. Longeque optime fecisse Herophilum et Erasistratum, qui nocentes homines a regibus ex carcere acceptos viuos inciderint, considerarintque, etiamnum spiritu remanente, ea, quae natura ante clausisset, eorumque posituram, colorem, figuram, magnitudinem, ordinem, duritiem, molliem, lacuorem, confractum, processus deinde singulorum et recessus, siue, quod inferitur alteri, siue quid partem alterius in se recipit &c.*

## §. V.

Morem atque consuetudinem cadauera inspicienti ab Ebraeis ortum traxisse non sine ratione affirmatur. Quippe cum Exodi XXI, 12. Leuit. XXIV, 17. ac Deut. XXI, 1. sq. sermo sit de mortuis ex vulnere (von Erschlagenen) verba et haec habentur in textu: *Wenn einer einen Menschen (vorsätzlich) schläget, daß er stirbet* &c. quae omnino ita interpretanda videntur, ut exinde, vulnera scilicet dum causa mortis existunt, moriatur, tunc ex lege divina morte puniendus venit percussor. Ita et erudite atque solide Ill. STRYCKIUS in programmate, Vitebergae edito, rem explanauit 1691. Quum vero sine instituta cadauerum sectione minime diiudicari possit accurate, an vulneratus ex vulnere, vel ex alia causa mortem subierit, omnino sequitur, iam tunc temporis sectionem cadauerum in more fuisse apud Iudaeos.

## §. VI.

Apud Aegyptios atque Iudaeos omnino medicos

et

et anatomicos exstitisse satis clarum est ex Geneseos L., 1. 2. vbi haec verba extant: *Joseph befahl seinen Knechten, den Aerzten, daß sie seinen Vater salbeten, und sie salbeten Israel vierzig Tage.* Illos vero, qui pollincturam instituerunt, in anatomicorum numerum referri debere, exinde planum esse videtur; cum omnino necessum fuerit, ut ante pollincturam viscera lustrando examinarent, ut diiudicare possent, quae fuerit causa mortis. Et si viscerum status ab hisce cadauerum pollinctoribus probe nosci potuit, extra controuersiam ponitur, illos et de qualitate et de quantitate vulnerum iudicium ferre potuisse.

## §. VII.

Ab hisce, Aegyptiis videlicet et Iudaeis, per manus Graecorum ad gentem Romanam deriuatae sunt sectiones legales. Apud hanc enim legalem cadauerum inspectionem in usu fuisse, ostendit antecessor Groeningensis, FELTMANNVS in tract. *de cadauere inspiciendo cap. 3.* Groeningae 1673. edito.

## §. VIII.

Ius canonicum de hac re clarius disponit, quando de homicidio agitur. Vid. *C. ad audientiam 12. de homicidio V. quia vero et c. VII. in fin.* verba haec leguntur: *Si ex ipsa percussione interierit vel aliam infirmitatem incurrerit, de qua noscitur expirasse &c.* Iunge STRVV. *obs. criminales ad Lib. V. X. c. 8. observ. II.* ibi et alleg. THEODORICVM in *colleg. crim. cap. VII. apb. I. §. 39.* Commendat itaque ius canonicum sectionem legalem, sine quamvis apparere possit, an quis ex morbo latente, an ex vulnere inflicto animam expirauerit.

## §. IX.

Tandem hancce legalem cadauerum inspectionem pro fundamento totius processus inquisitorii ponendum esse expresse mandat *Constitutio criminalis Carolina*, omnium statuum S. R. I. consensu recepta articulo nempe 147. et art. 149. in quibus de inspectione agitur. Et quo fiat talis actus legitimus, omnes quoque solennitates praescribit, quae quam exactissime observari debent. Articulus 147. sequentis est tenoris:

So einer erschlagen wird, und über etliche Zeit darnach stirbe, also daß zweifentlich wird, ob er der geklagten Streich halber gestorben wäre oder nicht, in solchen Fällen mögen beyde Theile (wie oben Beweifung gesagt ist) Kundschaft zur Sachen dienstlich stellen, und sollen doch, sonderlich die Wundarzt der Sach verständig, und andere Personen, die da wissen, wie sich der Gestorbene nach dem Schlagen und Rumor gehalten hab, zu Zeugen gebraucht werden, mit Anzeigung, wie lang der Gestorbene nach den Streichen gelebt habe, und in solchen Urtheilen sollen die Urtheiler bey den Rechtsverständigen, und an Enden und Orten, wie zu End dieser unser Ordnung angezeigt, Rathspflegen. Articulus vero 149. ita sonat: Und damit dann in obgemeldten Fällen gebührliche Ermässung und Erkenntniß solcher unterschiedlichen Verwundung halben, nach der Begräbniß des Entleibten desto minder Mangel sey, soll der Richter samt zweyen Schöpfen, dem Gerichtschreiber und einem oder mehr Wund-Ärzten, (so



(so man die haben und solches geschehen kan) die dann zuvor dazu beaidiget werden sollen, denselben toden Körper vor der Begräbniß mit Fleiß besichtigen, und alle seine empfangene Wunden, Schläg, Aufwürf, wie der jedes funden und er-messen würde, mit Fleiß merken und verzeichnen lassen.

## §. X.

Magistratus itaque, cui exercitium iurisdictionis altae in loco, vbi commissum est delictum, competit, vi officii, nemine etiam postulante, nulloque accusatore existente, etiam si delinquens fuga salutem quaesiverit, Actorio, scabinis, medicis et Chirurgis adhibitis, omni cura et non per transennam leuique brachio occisi corpus inspicere et vulnorum quantitatem qualitatemque annotare debet. Inspectio enim eiusmodi tantae est necessitatis, ut, hac omissa, vel non legitime facta, nil certi de poena delinquentis determinari queat. Hinc GLASSENIVS in commentario ad Const. crim. Caroli V, p. 561. inquit: Si inspectio, quae tamen ad corpus delicti inuestigandum spectat, omittatur, ob defectum certae scientiae, an vulnus letale fuerit, vel non, poena ordinaria adhiberi nequit; quippe quae nunquam decerni potest, nisi vbi constiterit de vulneris letalitate, de qua tamen index certus esse non potest, nisi facta prius diligenti cadaueris inspectione. Inde etiam multi Homicidae ordinaria poena legis Corneliae non puniuntur, ob culpam vel negligentiam iudicis, qui vel plane omisit cadaueris inspectionem, vel non legitime in isto actu processerit. Addatur CARPZOV in praxi criminali part. 1. quaest. 26. n. 30. qui inspectionem cadaueris partem praecipuam et necessariam inquisitionis vocat.

## §. XI.

Personae, quae ad eiusmodi sectionem iudicalem atque

atque inspectionem cadaveris ex vulnere mortui requiruntur, sunt iudex, actarius, scabini, medicus atque chirurgus.

## §. XII.

— Principalem tenet locum *iudex*, cuius praesentiam *Constitutio Carolina* absolute requirit atque mandat. Praesupponitur vero talis iudex, cui iurisdictio competit criminalis. Huius etenim praesentia inspectionem reddit firmissimam, ZIEGLERVS *ad Jus Can. p. 48.* et omnem suspicionem doli excludit, STRYCK *de iure sensuum diff. I. c. 2. lib. 18.* Et si inspectio praesente iudice fit, tunc illa palam et bona fide suscepta est. BARTOL. in *L. frater ff. de condit. indeb.* Hinc si medici et chirurgi propria autoritate, absente iudice, sectionem suscipiunt, talis actus pro incompleto et insufficienti habetur. Ideo in tali casu extraordinariam poenam scabini Lipsienses dictarunt, uti apparet ex CARPZOVII *Pr. Crimin. Part. I. qu. 26. num. 32. et 33.* Iudex vero praesens non solum probe attendere debet ad ea, quae inquisitum onerant, sed et ad ea curatius, quae possunt eundem subleuare; et horum certe potior habenda est ratio, cum ad absoluendum inquisitum maior, quam condemnandum sit obligatio. *L. 5. ff. de poenis.*

## §. XIII.

Persona itaque principalis est iudex, reliqui sunt ministeriales, quo pertinet secundo *Actarius* ita dictus, vel iudicis scribe, cuius praesentia in sectione legali admodum necessaria est; medicus enim ei in calamus dictitare debet omnia, quae, durante sectione, reperiuntur et observantur, dum medicus ipse manibus cruentis nihil potest chartae manda-

mandare, et tamen necessarium est omnia, quae in actu inspectionis observantur, annotare. Memoria hominum labilis est, medicus vero de omnium circumstantiarum, imo minimarum veritate certus esse debet, et registratura actuarii accurate consignata suppeditat medico omnia, quae ad visum suum et repertum (quod vocatur *Obductions-Beddel*) rite formandum pertinent. Et ut rei observatae veritas eo firmitior reddatur, medicus iudici, actuario et scabinis praesentibus, tanquam testibus ea, quae observat, ante oculos ponere, et hi, iudex nempe actuarius atque scabini registraturam, sectione ad finem perducta, subscriptione confirmare tenentur.

## §. XIV.

Hic non multis verborum ambagibus disputabimus, an iudex fungi possit munere actuarii? nam si dicendum, quod res est, nos illis Ictis assensum praebemus, qui quaestionem hancce negant. In primis acta eiusmodi, quae iudex, actuarii officium administrans, consignavit, si iurisdictio contentiosa est, nulla habentur, licet iudex ad actum iuraverit. Conf. BERGER in *oeconomia iuris* p. 952. Praeterea turpe videtur iudici, si acta, quae actuarii aut notarii chartae mandare debent, ipse conficiat, quod et ad Rectores academiarum extendendum esse minus dubito.

## §. XV.

Coeterum officium actuarii, quoad hunc actum, in eo consistit, ut omnia, quae ab initio huius actus vsque ad finem geruntur, fideliter consignet, ita, ut omni cura omnes fugillationes, maculas et vulnera, vel caesim vel punctim alioque modo occiso illata, una

B

cum

cum eorundem quantitate et qualitate, imo in quam corporis parte et regione, et quonam armorum genere ea inflicta fuerint, annotet, desuperque in vim maioris fidei registraturam exacte conficiat. IVL. CLARVS, L. 5. §. fin. qu. 4. n. 4. THEODORIC. in *colleg. criminal.* cap. 4. n. 9.

### §. XVI.

Constitutio criminalis Caroli V. requirit quoque scabinorum praesentiam, quae necessaria videtur, cum solus iudex absque scabinis et assessoribus iudicium constituere haud valeat. Scabini vero iuramento obstringuntur secundum C. C. C. V. art. 4. et hisce non adhibitis, vel iuramenti vinculo non obligatis inspectio pro legali non est agnoscenda. MAVRITIVS *Consil. Kilonens. cons. 24. n. 2. p. 117.* ob scabinorum absentiam Liplienses JCI poenam dictitarunt extraordinariam. CARPZOV *prax. Crim. P. I. qu. 26. n. 32.*

### §. XVII.

Quinta et sexta persona in hoc actu legali sunt medicus atque chirurgus. Egit de hisce fusius *Celeber. PRAESES in medicina legali cap. XXI.* Cum enim ad scientiam iuris vel legalem non pertineat iudicare de vulneris lethalitate, medici requiruntur, atque chirurgi, qui ex sectione curatius instituta, soli ex asse possunt iudicium ferre de vulnerum lethalitate. Vid. b. PRAGEMANNI, nostri, comment. *de fide, quae medicis apud JCtos est.* p. 4.

### §. XVIII.

Medici vero tales, ut iura volunt, sint (a) a iudice ad hunc actum inspectionis specialiter requisiti, et

et (b.) iurati, quia eorundem assertioni et relationi de vulnere lethali vel non lethali nulla fides adhibetur, nisi sit iuratoria; KLOCKIUS *Vol. III. Consil. 193. n. 3. 4.* CARPZOV *P. I. qu. 26. n. 24. et sqq.* Perinde tamen est, siue ante, siue post actum visum et repertum iuramento confirmet medicus. Coeterum talis medicus quoque debet esse examinatus, et in academiis summis in arte medica honoribus exornatus, ut testimonium eruditionis suae exhibere queat. Ex hoc enim fit, ut, cum in promotionis actu iuramentum deposuerit, ei eo maior fides habenda sit.

## §. XIX.

Quaestio hic mouetur, an iuramentum medici legalis in actu promotionis vel in principio officii sui vel physicatus praestitum sufficiat, et sese ad omnes actus futuros extendat? SCHOEPPERVS in dissert. *de haemorrhagia vulneratorum cap. 2. thes. 64.* putat, non sufficere promotionis iuramentum, cum ei non sit inserta formula de cadaueribus inspiciendis, ideo exigente vel indice vel inquisito iuramentum talis promotus medicus absolute praestare debet. Medici vero prouinciales vel vrbium physici in omni inspectione legali a iudice ante inspectionis actum admonendi sunt cum chirurgis iuratis, ut memores sint iuramenti illius, ab initio praestiti, quo eo maiorem diligentiam, curam atque circumspectionem in hoc arduo adhibeant negotio. Conf. STRYCK in tr. *de iure sensuum diff. 1. cap. 2. n. 32.* et SCHOEPPERVS in diff. cit. *cap. 2. thes. 62.*

## §. XX.

Coeterum liberum est iudici ad hunc actum  
B 2 maxim

maximi præiudicii duos obligare medicos; imo inquisito liberum manet in sui fauorem expetere medicum quemdam, quem iudex huic denegare non potest. Omnes vero medici in viso et reperto consentire debent; omnium enim oculis cadauer est expositum, et si in anatomia versati sunt, non possunt dissentire ratione vulneris; partes enim humani corporis sunt constantes, nec situm nec structuram mutant, et corpus humanum semper manet vnum idemque, tam in vno, quam in alio subiecto.

### §. XXI.

Si vero medici sectionem instituentes, et observantes, qui eruditi, periti et in anatomia exactissime versati esse debent, in iudicio de observatis in sectionis actu discrepent, adeo, ut vnus medicus vnus habeat pro lethali, alter vero, inquisiti nempe, idem venditet pro non lethali, tunc ad integram facultatem medicam confugiendum est, huiusque iudicium in casu proposito de lethalitate expectandum. Si vero integra collegia medica in consilium vocata dissentiant, causam pro reo decidendam, et mitiorem contra delinquentem eligendam sententiam. Icti non sine ratione statuunt. Vid. KRESSIVS in comment. ad C. C. C. art. 149. STRYCKIUS in usu moderno §. 3. tit. ad L. Corn. de sicariis et de Jure sens. §. 11. 20. Consultius enim est, nocentem dimittere, quam innocentem damnare.

### §. XXII.

Princeps requirit medicos. Hic non licitum est medici nomine abuti, sed sermo est de veris medicis, non de illis, qui se medicos fingunt, et qui nomine tantum tales sunt, atque a vulgo habentur, quales omnes sunt empirici. Veri autem medici sunt, qui

qui integram medicinam didicerunt, omnes medicinæ partes, quæ ad systema medicum requiruntur, probe callent, et medicinam cum philosophia naturali siue physica coniungunt. FELTMANNVS *l. c. p. 44.* vbi de medicis in hoc negotio adhibendis tractat, medicinam diuidit in speculatiuam et practicam, et asserit, quod quidem speculatiua medico perquam vtilis et necessaria sit, verum eam nihil valere, nisi cum praxi combinetur. Medicina praxi cassa inanis est. Praxis dat obseruationes et experientiam et sic veritatem, et sane medicinam præstat cumulare obseruationibus, quam vanis theoriis et speculationibus, quia vna obseruatio in re medica plus docet, quam centum speculationes. Ideo in sola theoria non acquiescendum, sed per obseruationes res in re medica commode explicandæ veniunt.

## §. XXIII.

Practicam medicinam FELTMANNVS iterum dispescit in diæreticam, pharmaceuticam atque chirurgicam, commendatque medicum in Chirurgia exercitatum. Medicinæ campus amplissimus est, et medica ars longa, vita vero brevis secundum Hippocratem. Quæ de causa apud Aegyptios et Romanos receptum fuit, ut singuli medici singulos curarent morbos, et nostris temporibus dantur medici oculares, lithotomi, imo alii, qui in arte obstetricandi excellunt. Chirurgia vero præsupponit physiologiam et pathologiam, imo exactissimam anatomiae scientiam. Sane anatomia subtilis maiorem habet vsum in chirurgia et praxi medica forensi, quam in ipsa medicina clinica. Hinc inquit FELTMANNVS, ad inspectionem cadaverum non esse adhibendum medicum diæreticum et pharmaceuticum, sed potius chirurgum, et quidem non eum solum, qui usu et ex-

perientia instructus tantum est, sed talem, qui ex principiis anatomicis totam humani corporis structuram et omnes eius partes earumque necessitudinem probe callet.

#### §. XXIV.

Princeps porro desiderat medicum, vel in doctorem vel in licentiatum renunciatum, qui testimonia suae eruditionis, exantlatis examinibus, a facultate et ordine medicorum impetrauit. Magni imperatoris Caroli V. medicus et archiater primarius erat VESALIUS, vir in anatomia versatissimus, qui sine dubio in construenda constitutione criminali consilia dedit. Ideo, quando sermo est von Wundärzten, siue de medicis vulnerariis, praesupponit medicos anatomicos et in chirurgia exercitatos. Eiusmodi doctores chirurgiae creantur in Italiae et Hispaniae academiis.

#### §. XXV.

Medici itaque forensis et cadauera inspicientis primaria proprietas est (1) *eruditio et peritia anatomica*. Scire enim et nominare et indicare debet in visò reposito regiones externas, per quas vulnus penetravit; (2) Scire debet osteologiam, vbi nempe haec vel illa ossa sita sint, quomodo nominentur, diuidantur, et inter se per articulationes connectantur, quales sint in ossibus sinus, foramina, processus et ligamenta, imo tendinum aponeuroses. Si enim haec norat, non potest iudicium ferrè de grauissimis vulneribus externis, in quibus ossa, ligamenta et aponeuroses musculorum siue musculorum insertiones vulnerantur, quae vulnera, si contingunt, grauissima symptomata habent pedisequa. (3) Scire debet integram myologiam, ut rite indicare ac nominare queat musculos, eos imprimis, per quos penetravit vulnus, et, quamuis



uis musculorum vulnera, in se spectata, raro sint lethalia; per mûculos tamen penetrant vasa, quae vulnerata ac laesa excitare solent haemorrhagiam. (4) Angiologiam siue doctrinam de vasis sanguiferis, arteriis et venis. Scire debet, quid sit arteria magna, quid pulmonalis, quid vena cava, pulmonalis, azygos, quid vena portae, quomodo se habeant arteriarum et venarum divisiones, quomodo in hac vel illa parte sita vasa vocentur. (5) Neurologiam siue doctrinam de nervis, nervorumque origine ex cerebro, et spinali medulla, eorumque distributionibus per partes corporis; v. g. quis vulneratur in collo sine notabili haemorrhagia, ex hoc tamen vulnere illico actionum vitalium notabilis fit imminutio ex languore summo, pulsu pravo inaequali, pallore faciei et labiorum, frigore externorum, apparet ideo, quod nervi, ad vitalia viscera determinata, sint laesi, sectio vero deinceps illud manifestat; (6) Adenologiam siue glandularum et vasorum lymphaticorum, ductuumque chyli ferorum possideat notitiam. Denique (7) Splanchnologiam, siue viscerum scientiam. Viscera enim sunt partes corporis principales, et ad vitam conservandam et continuandam admodum necessariae. Hisce enim mediantibus actiones naturales, vitales et animales absoluntur, quo pertinet doctrina de cerebro, de organis respirationis, ut de pulmonibus, larynge, diaphragmate, doctrina de organis circulationis sanguinis; cordis, ventriculorum, auricularum pericardii. Notitiam habeat omnium viscerum infimi ventris, viscerum chylicationis, et alimentorum mutationes, quo pertinet doctrina de ventriculo, de intestinis, mesenterio, omento, pancreate, liene. Item organa, quae urinae secretionibus inferiunt, ut sunt renes, vtreres, vesica urinaria, vtrhra. Denique organorum generatio-

nis

nis utriusque sexus habeat scientiam, quid scilicet sint vasa spermatica, ovarium, vterus, eiusque vagina, quid testes et mentula.

#### §. XXVI.

Medicus, cadauera inspiciens, quoque sit bonus atque eruditus physiologus et pathologus; imo et practicus; etenim in suo viso atque reperto non tantum indicare debet laesionem ipsam; eiusque quantitatem et qualitatem secundum principia anatomica, sed de laesionibus iudicium ferre debet, hoc enim desiderat iudex, qui scire vult, an quis mortuus sit ex morbo latente; an ex violentia; veneno; an ex negligentia; et culpa ipsius aegroti aut etiam adstantium? Fieri utique potest, ut ex morbo non lethali per negligentiam et errorem morbus oriatur lethalis. Eiusmodi vero iudicium non formari potest absque scientia pathologica. Ex physiologicis illa cognoscimus, quae requiruntur ad actionum integritatem huius vel illius organi principalioris vel minus principalioris, et examinandum semper, an ab illata laesione actio sit impedita, vel plane sublata, ita, ut nullo remedio possit restitui et redintegrari. In praxi quoque sit exercitatus, nam iudicium ferre debet de methodo medendi, an illa sit secundum regulas artis vel indicationes rite formata et instituta; imo de ipsis remediis in tali casu applicatis.

#### §. XXVII.

In actu inspectionis cadauerum requiruntur quoque chirurgi. Hic quaestio oritur: numi chirurgis solis, absente medico et physico ordinario inspectio committenda sit? Nos negativam defendimus sententiam. Etenim chirurgi, si rem spectes, nihil aliud sunt, quam medicorum ministri, quorum discipuli cadauer in locum lucidum, ubi sectio suscipienda, deportant,

portant, illudque a fordibus mundificant, capillos, si necesse est, deradunt, spongas, instrumenta, ad sectionem pertinentia, stilos et tubulos, medico secanti porrigunt, et, finita sectione, viscera examinata iterum in cavitates occultant, et integumenta decenter consunt.

## §. XXVIII.

Chirurgus peritus et in arte secandi exercitatus sub directione medici sectionem instituere potest atque suscipere, verum sane dolendum est, eiusmodi homines rarissime sufficienti et necessaria eruditione anatomica instructos esse. Illi inter alios eminent, qui in theatris anatomicis v. g. Berolinensi et Hanoverano educati sunt. Si vero chirurgus perfectam scientiam anatomicam non possidet, ita scilicet, ut probe sciat ea, quae de ossibus, ligamentis, musculis, arteriis, venis, nervis, ductibus chyloferis, viscerum structura, situ, connexionione atque officio in hoc negotio requiruntur, vix illi tuto sectio legalis committenda, quia neque accuratum secundum principia anatomica visum repertum in forma debita construere, neque accuratum iudicium de laesionis modo et quantitate formare valet.

## §. XXIX.

Tutius ergo est in tali negotio, si a iudice medici adhibentur, qui corporis incisionem perfectius callent. Vid. SCHOEFFERVS in diss. de vulneratorum haemorrhagia cap. 2. ib. 55. Si enim inspectio legalis instituenda, iudex saltem medicis credere solet. REYGERVS in thesauro pratico voce medicus. Et quamvis communiter sub nomine medicorum etiam chirurgi comprehendantur C. C. C. art. 149. attamen medicorum dicta chirurgorum assertis praeferrri omnino merentur, et id quidem ab maiorem praesumptum eruditionis

C

appa-

apparatum. Hac ex causa etiam FELTMANNVS l. 4. cap. 49. p. 121. inquit: *Si quaestio sit de laesa corporis humani parte, et medicinae doctores opimentur, quod homo vel inde mori debuerit, aut non; hoc vero aliter visum sit chirurgis, tunc index tuto fidem doctoribus habet, quod illi ex seueriore medicinae studio et exercitiis academicis melius praesumantur vires et corporis humani partes nosse. Caeterum vero visum repertum subseribere et iuramento confirmare debet chirurgus.*

§. XXX.

Secunda proprietas medici est conscientia. Medicus, quando peccat, peccat vel negligentia, vel ignorantia, vel dolo. Negligentia est praetermissio faciendorum ex animi ignauia. Ignorantia est inscitia eorum, quae scire tenemur, et sine quibus artem debito modo exercere non possumus. Dolus autem est malitia, ad decipiendum alterum adhibita. Medicus, qui non conscientiosus est, verbis et factis iudicem decipere facillime potest. Conscientiosus vero medicus pius et probus Deum timet, cui rationem actionum suarum in extremo iudicio reddere debet; hinc in secundo diligens et accuratus et in renunciando cautus est, neque inquisitum onerat praesuppositis suis, non satis fundatis, neque etiam ea, quae manifesta sunt atque in oculos omnium incurrunt, silentio praeternittit.

§. XXXI.

Hic quaestio noueri solet, an Iudaeus, medicinae doctor, a iudice ad inspectionem cadauerum sit admittendus? Verissimum quidem est, religionem nihil facere ad eruditionem, potest enim quis esse eruditissimus et insimul pessimus in religione, attamen negando decidendam esse quaestionem affirmatur. FELTMANNVS l. 4. cap. 45. hanc quaestionem pertrahit, eamque ad praeciuiciales refert, inquires: *primo quod com-*

communi] Ctorum suffragio Iudaeus in ordinem docto-  
rum cooprands non sit, et dignitas haec in iudaeos non  
cadat; *secundo*; Ius canonicum docere, ne quis ex Chri-  
stianis medicinam a Iudaeis capiat, et adducere exem-  
pla, in specie Caroli Calvi, qui a Iudaeo medico ve-  
neno fuerit enecatus; concludere simul, si Iudaei  
artem medicam exercere inter Christianos non pos-  
sunt, etiam non creandi sunt in doctores medicos.  
Verum enim vero experientia prohdolor! docet,  
quod dentur doctores Iudaei, qui honores summos  
in arte saluari in academiis Germaniae obtinuerunt.  
An vero talis doctor Iudaeus ad inspicienda cadauera  
admittendus sit, est quaestio, quam nobiscum negat  
FELTMANNVS, qui et alios Jctos citat, statuentes,  
Iudaeo medico fidem non esse habendam, quia eorun-  
dem fides falsa est, nec iuramenta praestare valent in  
hoc negotio necessaria. Ipse ZACHIAS lib. 6. qu. med.  
lig. tit. 1. qu. 3. nr. 10. in fine inquit: medicum christia-  
num peccare mortaliter, qui Iudaeum, aut alium  
quemcunque medicum, extra religionem christianam  
viventem, socium admittit. Similem sententiam fe-  
rendam esse, idem docet FELTMANNVS, si de ana-  
baptistis, mennonitis, et atheis sermo sit, utpote qui  
nullius Numinis reuerentia tangerentur.

## §. XXXII.

Lis nunc movetur, quomodo iuramentum in  
tam arduo negotio a medico praestitum, vocandum  
sit, an scilicet veritatis, an credulitatis? Dantur, qui  
defendunt, quod sit iuramentum merae credulitatis,  
cum ars medica tota sit coniecturalis. Concedimus  
quidem libenter, physicam et physicam adplicatam,  
sive scientiam medicam in multis obiectis esse tantum  
modo probabilē; multa enim circa humani corpo-  
ris fabricam latent et latebunt; b. tamen noster WE-



DELIVS in *suis theorematibus* inquit: *Medicina non est pure εὑχαρίστη sue coniecturalis, sed gaudet demonstrationibus firmis. Principia habet scientifica, et eadem applicat ad finem certum.* Et quod indubitatae atque eulentissimae in re medica dentur veritates, exinde probari potest. Quis enim dubitat aut dubitare potest de arteriarum et venarum maiorum, in partibus internis, vulneribus et horum vulnerum lethalitate absoluta, si contingunt, in arteria magna ascendente et descendente, pulmonali, subclauia, carotide, emulgente, vena caua, azygos? Si enim sanguinis circulus mox sistitur aliaque spatia occupat, homo illico moritur, et exinde prono sequitur alueo, haec vulnera esse lethalia.

### §. XXXIII.

Multi homines moriuntur ex vicio quodam interno et morbo latente, et quidem eo tempore, quando vulnerantur et leui percussione laeduntur. Casus si hic euenit, terminus fatalis cum termino laesionis coineidit. Eleganter hoc thema pertractauit Celeber. BOHNIVS in *renunc. vulner. lethal. p. 140.* et seqq. vbi refert, nobilem, cui quilibet summam senectutem promississet, ad latus vxoris repente occubuisse, cuius subitaneae mortis causa, in cadauere ruptura sinistri cordis ventriculi prope ostium aortae fuit. *Hanc ergo,* inquit BOHNIVS, *si paucis ab obitu horis, leuiter sanciari contigisset, nonne solius temporis rationem habens, ex vulnere mortifero decessisse autumasset.*

### §. XXXIV.

SCHOEPFERVS egregius *l. c. p. 27.* ideo hanc cautelam commendat inquisiti cognatis et amicis, ut, quam primum cognoscant, vulnerati et demortui cadauer esse inspiciendum a magistratu, simul petant, ut medicis iniungat

iungat omnes cavitates eorumque visura perlustrare. Possit enim detegi vitium, cui causam mortis clarius adscribi queat, cum alias iudices non minus ac medici contenti sunt, si partem laesam lustraverint, eiusque qualitatem protocollo inseruerint.

#### §. XXXV.

Insuper vulneratio mortis causa procatactica et remota, non vero immediata aut per se existit, e. g. si vlcus internum externa laesione rumpatur, sanies profundatur, oritur suffocatio vitaeque aufertur. Eiusmodi casum vide apud VALENTINUM in *Pand. med. legal. part. alt. introd.* §. 8. vbi quis a pollice in pectus impaeto exanimis corruerit, in cuius sectione empyema, a longis temporibus ibidem latens ac a contusione ruptum, causa mortis extiterit. Hic itaque repentina mors non a percutiente, sed a morbo latente immediate producta est. Leue vulnus, hydropico in abdomine inflictum, omnem aquam cum spiritibus animalibus ac anima ipsa, breui temporis spatio, educere posse, ex chirurgia notum est. Ex dictis hisce itaque patet, praesumptionem, quae ex temporis breuitate defumitur, esse incertam et fallacem, atque in criminalibus, vbi de poena capitis agitur, et vbi probationes luce meridiana clariores requiruntur, non applicabilem.

#### §. XXXVI.

Noua iam iam quaestio venit decidenda, num sectio et inspectio cadauerum in omnibus contingentibus casibus sit absolute necessaria, imo an iudex peccet, qui eandem negligit, inprimis si vulneratus teloletifero laesus in continenti post laesionem mortuus sit atque extinctus? Negatiuam sententiam excellentissimi defendunt. Icti, ut BRUNNEMANNVS in *processu inquisitorio cap. 7. n. 20.* quem allegant et sequuntur

FELT-

FELTMANNVS *de cadav. inspiciendo. cap. 6. §. 7.* STRYCK *de iure sensuum diff. 1. cap. 3. num. 23.* OLDEKOP *contra Carpz. decad. 1. qu. 8. n. f.* Ratio eorundem est, quod inspectio Vulneris ab imperatore Carolo V. tantummodo eo in casu requiratur, si dubium sit, an vulneratus ex vulnere sit mortuus, an ex alia causa, v. g. morbo latente, errore diaetae, imperitia et negligentia Chirurghi atque adstantium. Hunc in finem allegant verba C. C. C. art. 147. So einer geschlagen wird und über etliche Zeit darnach stirbt, also daß zweifelhaft wäre, ob er der getragten Streiche halber gestorben wäre oder nicht, si vero in continenti moriatur vulneratus, dubium nullum superesse, quin ex vulnere sit mortuus. Verum breuitas temporis praesumptionem quidem, non vero probationem plenam suppeditat, quae probatio tamen in criminalibus absolute necessaria est. Etenim omnino fieri potest, vt quis moriatur haemorrhagia, si vulnus non tempestive deligatur, cum tamen eiusmodi vulnus per se non lethale sit, ut recte iudicat SCHÖEPPERVS *l. c. p. 26.*

## §. XXXVII.

Facultas iuridica Lipsiensis facultatem medicam in consilium vocauit de quaestione: an vulnus femoris, ex quo ingens copia sanguinis effluxit, et ex quo vulneratus, intra duos horulae quadrantes mortuus, lethale pronunciari possit? medici, non obstante temporis breuitate, hoc negarunt. Vide integrum casum in terminis apud AMMANNVM *in medicina critica casu 17.*

